

『聖德太子傳曆』上 推古四年条

四年〈丙辰〉夏五月。太子謂惠慈法師曰。法華經中。此句落字。師之所見者如何。法師答啓。他國之經亦無有字。太子曰。於此句際落一字耳。吾昔所持之經。思有此字。法師答啓。殿下所持之經。在何處哉。太子微嗟答云。在大隋衡州衡山寺般若臺上。法師大奇。合掌禮拜。冬十一月、有司啓。法興寺造畢。是日惠慈。惠聰始住法興寺。太子奏於天皇。設無遮會。既而夕時有一紫雲。如花蓋形。降自上天。圓覆塔上。又覆佛堂。變爲五色。或爲龍鳳。或如人畜。良久向西而去。太子合掌目送。語左右曰。此寺感天。故有此祥。但三百年後。草露霑衣。五百年後。塔殿處亡。